



Professor Gion Antoni Bühler

president della Societad Rhæto-romanscha

(1886—1897).

Motto: Magnum voluisse — sat est.

Alla testa de quest volum dellas *Annalas* stat la *semeglia* de nies meriteivel president Gion Antoni Bühler da Domat, professor della scola cantonala a Cuera, il qual ei quest onn, la vigelia de Nadal nonspetgadamein en consequenza della daguota spartius da questa vita mundana nella vegliadetgna de 72 onns e 2 meins. Sias reliquias corporalas ruaussan presentamein nel terratsch dil santeri cattolic a Cuera; mo nossas Annalas han la sontga obligaziun de conservar cun pietat particularmein la memoria de quei, ch' il defunct ha duront sia liunga ed activa vita voliu, operau ed effectuaiu per il manteniment e per la sviluppaziun dil lungatg rhætoromansch.

Gion Antoni Bühler, il secund figl da Christian Balzer Bühler ed Antonia Caluori, ei naschius a Domat ils 20 d' October 1825. Siu bab ei staus biars onns de sia vita scolast ed organist a Domat; èra siu tat haveva onns ora sunau las orglas e fatg igl emprim cantadur de siu vitg natal, ed in auter antecessur ha scrit ina chronica della perioda dils Franzos de 1799, ch' ei deplorablamein ida denter la detta. Pia schascheva gia nella parentela de nies Bühler ina certa premura per ils studis e particularmein in natural talent musical, che ha èra se manifestau tier el, tier ses fragliuns e ses descendents. Questa disposiziun della famiglia Bühler